

AKASHVANI AIZAWL
REGIONAL NEWS BULLETIN
(MIDDAY)



MUHCS

Mizoram Universal Health Care Scheme chuan zawmtu neih belh zelin Mizoram sawrkar leh Medanta Hospital chuan inremna thuthlung an ziak.

Hmarchhak biala hriselna dinhmun tih hmasawn zel nan Medanta Hosptail chuan tun hnai khan Mizoram sawrkar nen Mizoram Universal Health Care Scheme (MUHCS) ah thawhdunna tur thuthlung an ziak a, hei hian damlote chu pawisa chawi ngailova an damdawiin kaltlanga an in enkawl theihna tur a chhawpchuah sak a, Medanta Hospital hi ramchhung hmun hrang hrang Gurugram, Noida, Lucknow, Patna, Indore, leh Ranchi ah te a awm a ni.

Medanta damdawiina Chairman leh Managing Director Dr. Naresh Trehan chuan hmarchhak biala hma thar an lak na chu lawmawm atih thu sawiin hei hian mipuite tan thil tha zawk a thlen ngei a beisei a ti a, Medanta ah chuan damlote uluk taka enkawl annih thin bakah an hamthatna tur hrang hrang ngaihtuah sak thin a ni a ti a, Mizoram sawrkar nena an thawhdunna chuan rah tha a chhuah ngei a beisei tih sawiin Mizo damlo an damdawiina enkawl tur an awm chuan theihtawp an chhuah dawn tih sawiin mitin ban phak nih an tum thu a sawi.

Mizoram hian hriselna kawngah harsatna tam tak a tawk thin a, ramchhunga Cancer tamna ber niin ramchhunga state hrang hrang zingah hriselna kawnga pachhe tak an ni a, a ramchhung awmdan te leh hmun kilkhawr zawk damdawiin awm mumal lohna thin chu tih hmasawn kawngah theihtawpin sawrkarin hna a thawk mek a, mi tin te mahni dinhmun hriatchian kawngah inhrilhhriat thar anih theih nan hma lak mek a ni bawk.

Mizoram State Health Care Society CEO Dr. Lalhriatzuali Ralte chuan Medanta nena an thawkdun tur chu Mizote tan chanchin lawmawm tak ani a ti a, hemi hmang hian Mizoram atanga damlo phai lam kal duh tan harsatna tam tak a chhawk zangkhai ngei a beisei tih sawiin in enkawl kawngah pawh damlote tan kawng awlsam zawk a siam sak ngei a beisei tih a sawi bawk.



MIZORAM TOPS REGIONAL SKILL COMPETITION

Ministry of Skill Development & Entrepreneurship buatsaih, India Skills Northeast Regional Competition 2025-26, Guwahati University-a neih zawh takah Mizoram team chuan Gold medal 9, Silver medal 3, Bronze medal 3 leh Medallion for Excellence 6 lain hmar chhak state-ah an champion.

Regional Skill Competition hi January ni 19 atanga ni 22inkarah Guwahati University-a neih a ni a, Trade hrang hrang inelna 26- awmin, Mizoram Team-te hian trade 20 ah inelna hmachhawnin hlawhtlinna ropui tak an rawn thlen a ni.

He Regional Skill Competition hi hmarchhak state hrang hrangte thiamna leh kutchhuak fiahna hmunpui a ni a. Mizoram team-te hlawhtlinna hian Mizoram thalaite kutchhuak leh thiamna chu hmarchhak state-ah chauh ni lo, ram pum huap pawhin a sang hle tih a nemnghet a ni.

Mizoram aiawhtute hi LESDE Department-in nikum December 8 atanga ni 12 chhunga Mizoram Skills Competition a buatsaih kaltlanga thlan an ni a. Northeast Regional Skills Competition-a Gold leh Silver la te hian India Skills Competition, National Level-ah Northeast Region ai an aw h anga, an tih that dan a zirin ‘World Skills Competition’ leh ‘Asian Skill competition’-ah India ai an aw h ang.



NCUI

National Cooperation Union of India (NCUI) leh Mizoram sawrkara Cooperation Department buatsaihin Mizoram hmun hrang hrangah “Capacity Building Programme for Cooperation in Mizoram” tih chu tunlai hian buatsaih a ni.

NCUI aiawh Asst. Director pahnih Pu Paghuvanshi leh Chandan Singh te chuan Lunglei an tlawnah ah vawiin khan Zobawm M-PACS Electric veng Lunglei tlawnin hun an hmang a, an tum ber chu thalai te hnenah Cooperative chu hna siamtu a nih thu tlangaupui bakah thalai te inhmang tura fuih ani an ti a, khawtlang leh state tan pawh a tangkai hle dawn tih an sawi a ni.

NCUI aiawhte chuan Mizoram Sorkarin a tuipui naah lawmthu sawiin Mizoram State chu Cooperation lamah a la hniam deuh avangin hmun hrang hrang an tlawnkual chu hmang tangkai se an duh thu an sawi a, Mizo te chu hnam taima leh hmeichhia thlenga hnathawk tamna hmun anih avangin an tan kawng zau tak a inhawng an ti a, hmn danga hun an hman tawh na ah rah chhuah tha tak tak an hmu tih sawiin thalaiten Cooperation Movement chu luhchilh turin an sawm a ni.

India ramah hian Cooperation Movement hi a la hniam hle a, mihring 100-ah 4% chauhin Cooperation Movement hi hria ang an la ni a, hetihlai hian Maharashtra, Gujarat leh Telengana ah chuan zaa 57% vel daihin he Movement hi an hmang tangkai a, hmarchhak bial bikah Cooperation Movement hi tihchak ala ngai hle a ni.



REPUBLIC DAY MEGA FAIR

Akashvani Aizawl leh AZ Events chuan Republic Day pualin Mega Fair (bazar pui) Millennium Centre chung zawlah a buatsaih a ni.

Republic Day puala Mega Fair (Bazar pui) hi vawiin atanga hawn tan niin tun thla January ni 28 thleng a awh dawn a, Millennium Centre chungzawl exhibition hall ah nitin zing dar 10 atanga tlai dar 5 thleng thil chi hrang hrang zawrhna leh intihhlamna bakah ei leh in tur te a awm dawn a ni.

Akashvani Aizawl leh AZ Events chuan Bazar pui buatsaih tlawh tur hian mipui zawng zawng a sawm a ni.



PHE

PHE Minister Prof. Lalnilawma’n AMRUT 2.0 hnuaia thawh tur, mahni in leh kawtkaia kartluana chatlak lova tui herhhaw theihna tur '24X7 Pilot Project', Aizawl Vaivakawn leh Chawnpui veng hmun thenkhata kalpui tur chu a hawng.

Hawna inkhawm hi nizan khan Helen Lowry Auditorium, 7th Day Tlangah buatsaih niin PHE Minister chuan 24X7 tui herhhaw theihna tur project chu Mizoram tan mellung pawimawh tak a nih thu a sawi a, UD&PA kaltlanga Ministry of Housing and Urban Affairs atanga hmuh a nih thu sawiin Cheng Vbc 5.24 seng a thawh tur niin, pilot project a nih angin chhungkua/In 300 a huam dawn a, smart meter vuah vek tur a ni a, project atan hian pipeline network thar hman a nih tur thu a sawi.

Minister chuan department in hnathawh nan in hmun leh ramte khawih chet a ngaih chang a awm thin avangin veng thenkhatah hna thawh harsat chang a tam thu a sawi a, Aizawl mai ni lo khawpui dangten tui hnianghnar an neih theih nan sawrkar laipui lamah khawpui dangte tan project lian tham an beisei thu a sawi bawk.

